



UKA16/136 & 137

13. oktober 2016

Sara Olsvig

**Borgmesterit borgmesteritut atuunnermik saniatigut aallaavittut allamik suliffeqarsinnaanerannik suliffimmilluunniit ingerlatsisinnaanerannik pisinnaajunnaartitsisumik, Naalakkersuisut kingusinnerpaamik UKA 2017-imi kommunit aqunneqarnerat pillugu Inatsisartut inatsisaanut allannguutissatut siunnersuummik saqqummiussinissamik peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasortaq Ane Hansen, Inuit Ataqatigiit)

**Kommunit kattunnerisa kingorna Naalakkersuisut malitseqartitsillutik aaqqissuusseqqissinnaanissamat UKA2017-mut sinaakktissanik tunngavigisassanillu nassuiaasioqqullugit Inatsisartut aalajangiiffissaattut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

Kujammut, kangimut avannamullu qiviarutta kommunet kattunnerisa kingorna pissutsinik iliuuseqarfigineqartariaqartunik takusaqassaagut.

Kommunit kattunnerini kommunenut ataasiakkaanut suliassat annertusipput, borgmesterinut maanna akissarsiaqarnikkut aamma qaffaavigineqarsimasunut suliassat oqimaannerulerput kommunalbestyrelsenullu qinikkatut suliassat siammassinnerulerlutillu annertunerulerlutik.

Soorunami naliliisariaqarpugut innuttaasut sullinneqarneranni naammagineqarsinnaasumik kommuneni maanna sisamaasuni ingerlatsisoqarsimanersoq.

Taamaammat Inuit Ataqatigiit kommunet kattunnerisa kingorna sinaakktissanik tunngavigisassanillu Naalakkersuisunut nassuiaasioqqusilluta aalajangiiffissatut siunnersuummik saqqummiussivugut.

Inuit Ataqatigiit naliligassatut qaqitavut matumani pineqartut Naalakkersuisunit itigartinneqarput. Itigartinneqarput naak kommuneni angalagaanni nalilersugassat imaaginnavissut kialuunniit takusinnaagai malugisinnaallugillu. Neriuppugut partiit innuttaasut maalaartarnerat tusaallugu ataatsimullu isiginnissinnaassuseqarlutik suleriaatsimik illersorneqarsinnaasumik nassaarnissamat peqataajumaartut.

Akissusaaffimmi uatsinniippoq. Kujataani kommunep iluani eqiterunneq ingerlanneqartoq innuttaasunut kingunerluppoq, avannaani illoqarfiit ilaannaat annertuumik sammineqarnerat illoqarfinnut arfineq marlunnut sinneruttunut nunaqarfippassuarnullu kingunerlussimavoq. Qeqqani allaat, illoqarfiit marluinnaagaluartut nunaqarfiillu ikittuinnaagaluartut, innuttaasut ilaat piugugaasutut misigisimallutik maalaartarput.

Nuna tamakkerlugu aaqqitassaqarpugut.

# INUIT ATAQATIGIIT

## INATSISARTUNI



Nuna tamakkerlugu ataatsimullu isiginnilluta naliliinissarput pisariaqarpoq. Innuttaasummi sullinneqarnerminni naammaginninnatik oqariartuuteqartuarput. Naalackersuinikkullu akisussaasugut uaguuvoq nuna tamakkerlugu isiginnilluta taama oqariartornermut qisuariartariaqartugut.

Nuna tamakkerlugu isiginninngikkutta aqunneqarsinnaajunnaartumik ingerlatseriaatsimik aallartitsissaagut.

Naalackersuisut maanna kommune ataasiinnaq iliuseqarfigissallugu siunnersuuteqarput. Qaasuitsup Kommuneani kommunalbestyrelsep isummersimanera Inuit Ataqatigiit ataqqivarput. Innuttaasut taasitinneqarsimapput, aap - taasititsinerli sioqqullugu piareersarneq amigarluinnarsimasoq ilisimaneqarpoq, taasisinnaatitaasullu affai sinnilaaginnarlugit taamaallaat taasiartorsimanerinit tamassumunnga ersiutitut ippoq.

Qaasuitsup Kommuneani kommunep angivallaarneranik oqariartorneq erseqqissoq paasissutissatut pingaartinneqartariaqartutut tigussavarput. Nuna tamakkerlugu naliliinermi paasissutissaq taanna atussavarput ataatsimullu isiginnilluta qanoq iliuseqarsinnaanissatsinnut ilanngullugu pigissallutigu.

Allanngortoqartariaqarnera apeqqusinngilarput.

Suleriaaserli naalackersuinikkut atussallugu toqqarneqartoq aqunneqarsinnaajunnaartumik inissisussaavoq.

Tullianimi kommunet arlaat avinneqarumalluni aalajangerpat, taava nuna tamakkerlugu naalackersuinikkut akisussaasuusugut nunap sinnera ilanngullugu naliliiviginagu maliinnassavarput? Qaqugu taava allanngortiterisaqattaarneq unissava? Qaqugu inuussutissarsiornikkut, isumaginninnikkut, atuarfeqarnikkut, meeqqanut paaqqinnittarfeqarnikkut suliassanilu allarpassuarni kommunet taava eqqissillutik ineriartortitsisinnaanngussappat? Suliassaqarfinnini arlalinni sulineq pitsanngoriaateqarsimasutut oqaatigineqarpoq. Taamaakkaluartoq kommunep ataatsip, immaqa ukiuni kingullerni suliassat taakkua isumaginissaat tunulliullugit nukippassuit avinneqaqqinnissamut atorpai.

Innuttaasut sullinneqarnerat tamatumani qanoq issimanera maanngaanniillu qanoq ittuunissaa eqqarsaatigilluaqqissaaneqartariaqarpoq.

Naalackersuinikkut qanoq ingerlatseriaaseqarniarnermik Naalackersuisut siulittaasuat maannakkut nassuiaasariaqarpoq. Nunarput naalackersuinikkut siuttuuffigineqarpa, imaluunniit pisumit pisumut taamungaannaq aalajangiisoqartarniarpa? Kommunet qanoq katitigaanerat ineriartortitsinermi qitiulluinnarpoq. Kommunemmi namminersornerisa annertusarnissaa siunertaagaluarpoq, aqqut taanna aamma tassaammat innuttaasunut qanimut oqartussaqaataanerup annertunerulernissaanut aqqut.

Inuit Ataqatigiit siunnersuutigisarput tassaavoq nuna tamakkerlugu kommunet kattunnerisa kingorna naliliisoqarnissaa salliutillutigu suliarissagipput, aaqqiissutissanik siunissami attanneqarsinnaasunik ataatsimoorluta nassaarsinnaajumalluta.

Pisariaqarpoq kommunet qanoq katitigaanissaannut isummernissaq. Pisariaqarpoq qanimut oqartussaqaataanerup qanoq ittuunissaanik eqqartuilluarnissaq. Pisariaqarpoq kommunet

# INUIT ATAQATIGIIT

## INATSISARTUNI



oqartussaaqataaffigisinnaasaannik annikillisaanata, innuttaasut kommunertik aqutugalugu namminersornissaminnut aamma siunertaqarnerat pillugu eqqarsaatigilluagaasumik inissiinissaq.

Kommunep ataatsip avinneratigut tamakkua naammassineqarsinnaanngillat.

Inuit Ataqtigiiit neriuppugut siunnersuuterput paasilluarneqarluni tigulluarneqassasoq. Kommunemmi tamakkerlugit naliliivigisariaqarpavut. Nuna tamakkerlugu innuttaasut aaqtitassanik tikkuussipput. Kommunemi ataasiinnarmiunngitsoq.

Siunnersuutit aappaat oqallinnermi matumani siullermeerneqartoq tassaavoq borgmesterit borgmesteriunertik saniatigut allanik suliffeqarfinnik aallutaqannginnissaannik siunnersuut.

Tamatumani pingaartitarpur qitiutitarpullu tassaavoq innuttaasut naammaginartumik sullinneqarnissaat.

Nuna tamakkerlugu angalasimaqaagut innuttaasullu tusaasarpavut borgmesteriminnik takusaqartaratik oqaritartuuteqartut. Tusaanngitsuusaaginnarsinnaanngilarput qanimut oqartussaaqataanerup sanngiillisinneqarsimanerata saniatigut innuttaasorpasuaqarmat borgmesteriminnit sumiginnagaasutut misigisimasut.

Inuit Ataqtigiiit piffissanngornasoraarput kommuneni qinikkatut inissisimanermi pisussaaffiit piunasaqaatillu qanoq ittuunerinik nalileeqqinnissamut.

Kommunet kattunnerini suliasat ataatsimoorluta naammaginartumik suliarissagutsigit akisussaaffik qanoq ittoq tigumminerlutigu paasisariaqarparput.

Innuttaasut pillugit sulissaagut, inuttut soqutigisat salliutissanngilagut. Taama erseqqitsigisumik oqaatigineqarsinnaavoq.

Kommuneqarfik Sermersuumi qanimut oqartussaaqataanerup tungaatigut iliuseqarnerit nuannaarutigalutigit malinnaaffigaavut. Nunaqarfinni aqutsisut ulluinnarni oqartussaaffiigaanatik aningaasanillu aqutassaqarlutik inissisimanerat inatsisitigut nuna tamakkerlugu assigiiarnerulersinnissaa suliarineqartariaqartoq isumaqarpugut. Taamatuttaaq najukkani ataatsimiititalianik pilersitsinerit inatsisitigut nuna tamakkerlugu atuutilertariaqarpoq piunasaqaataasariaqarlunilu.

Innuttaasut tamatumani peqataarusussuseqarnerat aamma qitiulluinnarpoq. Upperilluinnarparput innuttaasut qinikkaminnik qanimut naapitsisarunik toqqaannartumillu eqqartueqatigiinnissamut periarfissaqarunik peqataarusussuseqarnerat aamma annertusissasoq.

Demokratii sipaarfigalugu ingerlanneqassanngilaq. Suliassaq tamatta pimooruttariaqarparput maanilu inersuarmi naalackersuinikkullu ingerlatsinikkut nuna tamakkerlugu isiginnilluta aaqqiissaagut. Tassa suliassaqarput.

Naalackersuisut partiillu sakkortuumik kissaateqarfigaavut nuna tamakkerlugu isiginnilluta innuttaasullu sullinnerini qaffasissumik immitsinnut piunasaqarluta ingerlatsissasugut.

Siunnersuutivut ataatsimiititaliani susassaqtuni misissortitsigit, immitsinnut salliutinnata innuttaasut salliutitsigit.

# INUIT ATAQATIGIIT

## INATSISARTUNI



Qujanaq.